

四庫全書

子部

欽定四庫全書

朱子語類卷七十四

易十

上繫上

繫辭或言造化以及易或言易以及造化不出此理

闕

上下繫辭說那許多交直如此分明他人說得分明便淺近聖人說來却不淺近有含蓄所以分在上下繫也無甚意義聖人偶然去這處說又去那處說嘗說

道看易底不去理會道理却只去理會這般底譬如
讀詩者不去理會那四字句押韻底却去理會十五
國風次序相似淵

問第一章第一節蓋言聖人因造化之自然以作易曰
論其初則聖人是因天理之自然而著之於書此是
後來人說話又是見天地之實體而知易之書如此
如見天之尊地之卑却知得易之所謂乾坤者如此
如見天之高地之下却知得易所分貴賤者如此又

曰此是因至著之象以見至微之理

闕

天尊地卑至變化見矣是舉天地事理以明易自是故

以下却舉易以明天地間事

人

天尊地卑乾坤定矣觀天地則見易也

個

天尊地卑上一截皆說面前道理下一截是說易書聖

人做這箇易與天地準處如此如今看面前天地便

是他那乾坤卑高便是貴賤聖人只是見成說這箇

見得易是準這箇若把下面一句說做未畫之易也

不妨然聖人是從那有易後說來

淵

天尊地卑乾坤定矣上句是說天地造化實體以明下句是說易中之事天尊地卑故易中之乾坤定矣楊氏說得深了易中固有屈伸往來之乾坤處然只是說乾坤之卦在易則有乾坤非是因有天地而始定

乾坤

潛

天尊地卑章上一句皆說天地下一句皆說易如貴賤是易之位剛柔是易之變化類皆是易不必專主乾

坤二卦而言方以類聚物以羣分方只是事訓術訓
道善有善之類惡有惡之類各以其類而聚也

謨

卑高以陳貴賤位矣此只是上句說天地間有卑有高
故易之六爻有貴賤之位也故曰列貴賤者存乎位

階

問方以類聚物以羣分曰物各有類善有善類惡有惡

類吉凶於是乎出又曰方以事言物以物言

礪○人
傑錄云

方猶
事也

方以類聚物以羣分楊氏之說為方字所拘此只是物有本末事有終始之意隨其善惡而類聚羣分善者吉惡者凶而吉凶亦由是而生耳伊川說是亦是言天下事物各有類分故存乎易者吉有吉類凶有凶類

雷

問方以類聚物以羣分曰方向也所向善則善底人皆來聚所向惡則惡底人皆來聚物又是通天下之物而言是箇好物事則所聚者皆好物事也若是箇不

好底物事則所聚者皆不好底物事也

熹

在天成象在地成形變化見矣上是天地之變化下是
易之變化蓋變化是易中陰陽三爻之變化故曰變
化者進退之象也變化只進退便是如自坤而乾則
為進自乾而坤則為退進退在已變未定之間若已
定則便是剛柔也

帶

問不知變化二字以成象成形者分言之不知是滾同

說

學履錄云問不知是變以成象化以成形為將
是變化二字同在象形之間曰不必如此分

曰

莫分不得變化二字下章說得最分曉文蔚曰下章云變化者進退之象如此則變是自微而著化是自盛而衰曰固是變是自陰而陽化是自陽而陰易中說變化惟此處最親切如言剛柔者立本者也變通者趨時者也剛柔是體變通不過是二者盈虛消息而已此所謂變化故此章亦云剛柔者晝夜之象也變化者進退之象也剛柔者晝夜之象所謂立本變化者進退之象所謂趨時又如言吉凶者失得之象

悔吝者憂虞之象悔吝便是吉凶底交互處悔是吉

之漸吝是凶之端

文蔚

問變化是分在天上說否曰難為分說變是自陰而陽自靜而動化是自陽而陰自動而靜漸漸化將去不見其迹又曰橫渠云變是倏忽之變化是逐旋不覺化將去恐易之意不如此說既而曰適間說類聚羣分也未見說到物處易只是說一箇陰陽變化陰陽變化便自有吉凶下篇說得變化極分曉剛柔者

晝夜之象也剛柔便是箇骨子只管恁地變化礪

摩是那兩箇物事相摩戛盪則是圓轉推盪將出來摩是八卦以前事盪是八卦以後為六十四卦底事盪是有那八卦了圓旋推盪那六十四卦出來漢書所謂盪軍是圓轉去殺他磨轉他底意思閱

問剛柔相摩八卦相盪竊謂六十四卦之初剛柔兩畫而已兩而四四而八八而十六十六而三十二三十二而六十四皆是自然生生不已而謂之摩盪何也

曰摩如物在一物上面摩旋底意思亦是相交意思
如今人磨子相似下面一片不動上面一片只管摩
旋推盪不曾住自兩儀生四象則老陽老陰不動而
少陰少陽則交自四象生八卦則乾坤震巽不動而
兌離坎艮則交自八卦而生六十四卦皆是從上加
去下體不動每一卦生八卦故謂之摩盪

銖

剛柔相摩八卦相盪方是說做這卦做這卦了那鼓之
以雷霆與風雨日月寒暑之變化皆在這卦中那成

男成女之變化也在這卦中見造化閑捩子才動那許多物事都出來易只是模寫他這箇

淵

鼓之以雷霆潤之以風雨此已上是將造化之實體對

易中之理此下便是說易中却有許多物事

滯

乾道成男坤道成女通人物言之如牝馬之類在植物亦有男女如有牝麻及竹有雌雄之類皆離陰陽剛柔不得

滯

乾知大始坤作成物知者管也乾管却大始大始即物

生之始乾始物而坤成之也

謨

或問乾知大始坤作成物乾以易知坤以簡能如何是知曰此知字訓管字不當解作知見之知大始是萬物資始乾以易故管之成物是萬物資生坤以簡故能之大抵談經只要自在不必泥於一字之間

蓋卿

乾知大始知主之意也如知縣知州乾為其初為其萌芽坤作成物坤管下面一截有所作為乾以易知乾陽物也陽剛健故作為易成坤以簡能坤因乾先發

得有頭腦特因而為之故簡節

乾以易知坤以簡能他是從上面乾知大始坤作成物處說來文蔚曰本義以知字作當字解其義如何曰此如說樂著太始太始就當體而言言乾當此太始然亦自有知覺之義文蔚曰此是那性分一邊事曰便是他屬陽坤作成物却是作那成物乃是順乾乾以易知坤以簡能易簡在乾坤易則易知簡則易從却是以人事言之兩箇易字又自不同一箇是簡易

之易一箇是難易之易要之只是一箇字但微有毫釐之間因論天地間只有一箇陰陽故程先生云只有一箇感與應所謂陰與陽無處不是且如前後前便是陽後便是陰又如左右左便是陽右便是陰又如上下上面一截便是陽下面一截便是陰文蔚曰先生易說中謂伏羲作易驗陰陽消息兩端而已此語最盡曰陰陽雖是兩箇字然却只是一氣之消息一進一退一消一長進處便是陽退處便是陰長處

便是陽消處便是陰只是這一氣之消長做出古今天地間無限事來所以陰陽做一箇說亦得做兩箇

說亦得

文蔚

問乾知是知坤作是行否曰是又問通乾坤言之有此理否曰有如何是易簡曰他行健所以易易是知阻難之謂人有私意便難簡只是順從而已若外更生出一分如何得簡今人多是私意所以不能簡易易故知之者易簡故從之者易有親者惟知之者易故

人得而親之此一段通天人而言

祖道

乾以易知乾惟行健其所施為自是容易觀造化生長則可見只是這氣一過時萬物皆生了可見其易要生便生更無凝滯要做便做更無等待非健不能也

間

乾德剛健他做時便通透徹達攔截障蔽他不住人剛健者亦如此乾以易知只是說他恁地做時不費力

淵

坤以簡能坤最省事更無勞攘他只承受那乾底生將
出來他生將物出來便見得是能陰只是一箇順若
不順如何配陽而生物淵

易簡一畫是易兩畫是簡

泳

問乾坤易簡曰易簡只看健順可見又曰且以人論之
如健底人則遇事時便做得去自然覺易易只是不
難又如人稟得性順底人及其作事便自省事自然
是簡簡只是不繁然乾之易只管得上一截事到下

一截却屬坤故易坤只是承乾故不著做上一截事
只做下面一截故簡如乾以易知坤以簡能知便是
做起頭能便是做了只觀隤然確然亦可見得易簡
之理帶

伯豐問簡易曰只是健順如人之健者做事自易順承
者自簡靜而不繁只看下繫確然隤然自分曉易者
只做得一半簡者承之又如乾恒易以知險坤恒簡
以知阻因登山而知之高者視下可見其險有阻在

前簡靜者不以為難

人餘

伯謨問乾坤簡易曰易只是要做便做簡是都不入自家思惟意思惟順他乾道做將去又問乾健德行常易以知險坤順德行常簡以知阻曰自上臨下為險自下升上為阻故乾無自下升上之義坤無自上降

下之理

賀孫

問乾坤易簡曰簡字易曉易字難曉他是健了

饒本云逐日被

他健了

自然恁地不勞氣力才從這裏過要生使生所

謂因行不妨掉臂是這樣說話繫辭有數處說易簡
皆是這意子細看便見又問健不是他要恁地是實
理自然如此在人則順理而行便自容易不須安排
曰順理自是簡底事所謂易便只是健健自是易
乾以易知坤以簡能以上是言乾坤之德易則易知以
下是就人而言言人兼體乾坤之德也乾以易知者
乾健不息惟主於生物都無許多艱深險阻故能以
易而知大始坤順承天惟以成物都無許多繁擾作

為故能以簡而作成物大抵陽施陰受乾之生物如
瓶施水其道至易坤惟承天以成物別無作為故其
理至簡其在人則無艱阻而白直故人易知順理而
不繁擾故人易從易知則人皆同心親之易從則人
皆協力而有功矣有親可久則為賢人之德是就存
主處言有功可大則為賢人之業是就做事處言蓋
自乾以易知便是指存主處坤以簡能便是指做事
處故易簡而天下之理得則與天地參矣

銖

問乾以易知坤以簡能本義云乾健而動故以易而知
大始坤順而靜故以簡而作成物若以學者分上言
之則廓然大公者易也物來順應者簡也不知是否
曰然乾之易致知之事也坤之簡力行之事也問恐
是下文易則易知簡則易從故知其所分如此否曰
他以是而能知故人亦以是而知之所以坤之六二
便只言力行底事

幹

天行健故易地承乎天柔順故簡簡易故無艱難敬

仲

問易則易知簡則易從曰乾坤只是健順之理非可指乾坤為天地亦不可指乾坤為二卦在天地與卦中皆是此理易知易從不必皆指聖人但易時自然易

知簡時自然易從

謨○去
偽同

問如何是易知曰且從上一箇易字看看得易字分曉自然易知久之又曰簡則有箇睹當底意思看這事可行不可行可行則行不可行則止所以謂之順易則都無睹當無如何若何只是容易行將去如口之

欲語如足之欲行更無因依口雖是說話足雖是行履如虎嘯風冽龍興致雲自然如此更無所等待非至健何以如此這箇只就健字上看惟其健所以易雖天下之至險亦安然行之如履平地此所以為至健坤則行到前面遇着有阻處便不行了此其所以為順

個

問易則易知先作樂易看今又作容易如何曰未到樂易處礪曰容易如何便易知曰不須得理會易知且

理會得易字了下面自然如破竹又曰這處便無言
可解說只是易又曰只怕不健若健則自易易則是
易知這如龍興而雲從虎嘯而風生相似又曰這如
鴻毛之遇順風巨魚之縱大壑初不費氣力又曰簡
便如順道理而行却有商量闕

易知則有親易從則有功惟易則人自親之簡則人自
從之蓋艱阻則自是不親繁碎則自是不從人
既親附則自然可以久長人既順從則所為之事自

然廣大若其中險深不可測則誰親之做事不繁碎人所易從有人從之功便可成若是頭項多做得事來艱難底必無人從之滯

只為易知易從故可親可久如人不可測度者自是難親亦豈能久煩碎者自是難從何緣得有功也謨

易繫解易知易從云知則同心從則協力一於內故可久兼於外故可大如何曰既易知則人皆可以同心既易從則人皆可以協力一於內者謂可久是賢人

之德德則得於已者兼於外者謂可大是賢人之業
事業則見於外者故爾

謨

蕭兄問德業曰德者得也得之於心謂之德如得這箇

孝則為孝之德業是做得成頭緒有次第了不然汎

汎做只是俗事更無可守

蓋卿

德是得之於心業是事之有頭緒次第者

方子

黃子功問何以不言聖人之德業而言賢人之德業曰

未消理會這箇得若恁地理會亦只是理會得一段

文字良久乃曰乾坤只是一箇健順之理人之性無不具此雖千萬人吾往矣便是健雖褐寬博吾不惴焉便是順如剛果奮發謙遜退讓亦是所以君子富貴不能淫貧賤不能移威武不能屈非是剛强健之理如此至於出門如見大賓使民如承大祭非是巽懦順之理如此但要施之得其當施之不當便不是乾坤之理且如孝子事親須是下氣怡色起敬起孝若用健便是悖逆不孝之子事君須是立朝正色犯

顏敢諫若用順便是阿諛順旨中庸說君子而時中
時中之道施之得其宜便是文蔚曰通書云性者剛
柔善惡中而已此一句說得亦好先生點頭曰古人
自是說得好了後人說出來又好徐子融曰上蔡嘗
云一部論語只如此看今聽先生所論一部周易亦
只消如此看先生默然

文蔚

可久則賢人之德可大則賢人之業楊氏可而已之說
亦善又問不言聖人是未及聖人事否曰成位乎其

中便是說抵著聖人張子所謂盡人道並立乎天地
以成三才則盡人道非聖人不能程子之說不可曉

按楊氏曰可而已非其至也故為賢人之德
業本義謂法乾坤之事賢於人之賢○當

易簡理德只是淨淨潔潔無許多勞擾委曲

端蒙

伯豐問成位乎其中程子張子二說孰是曰此只是說

聖人程子說不可曉

當

右第一章

聖人設卦觀象至生變化三句是題目下面是解說這

箇吉凶悔吝自大說去小處變化剛柔自小說去大處吉凶悔吝說人事變化剛柔說卦畫從剛柔而為變化又自變化而為剛柔所以下箇變化之極者未到極處時未成這箇物事變似那一物變時從萌芽變來成枝成葉化時是那消化了底意思

淵

剛柔相推是說陰陽二氣相推八卦相盪是說奇耦雜而為八卦在天則剛柔相推在易則八卦相盪然皆自易言一說則剛柔相推而成八卦八卦相盪而成

六十四卦 備

吉凶者失得之象悔吝者憂虞之象變化者進退之象
剛柔者晝夜之象四句皆互換往來乍讀似不貫穿
細看來不勝其密吉凶與悔吝相貫悔自凶而趨吉
吝自吉而趨凶進退與晝夜相貫進自柔而趨乎剛
退自剛而趨乎柔 謹

繫辭一字不胡亂下只人不仔細看如吉凶者失得之
象四句中間兩句悔是自凶而向乎吉吝是自吉而

趨乎凶進是自柔而向乎剛退是自剛而趨乎柔又如乾知險坤知阻何故乾言險坤言阻舊因登山曉得自上而下來方見險處故以乾言自下而上去方見阻處故以坤言

淳

吉凶悔吝四者正如剛柔變化相似四者循環周而復始悔了便吉吉了便吝吝了便凶凶了便悔正如生於憂患死於安樂相似蓋憂苦患難中必悔悔便是吉之漸及至吉了少間便安意肆志必至做出不好

可羞吝底事出來吝便是凶之漸矣及至凶矣又却
悔只管循環不已正如剛柔變化剛了化了柔柔
了變變便是剛亦循環不已吉似夏吝似秋凶似冬
悔似春

個

問本義說悔吝者憂虞之象以為悔向凶而趨吉吝自
吉而向凶竊意人心本善物各有理若心之所發鄙
吝而不知悔這便是自吉而向凶曰不然吉凶悔吝
正是對那剛柔變化說剛極便柔柔極便剛這四箇

循環如春夏秋冬相似凶便是冬悔便是春吉便是
夏吝便是秋秋又是冬去又問此以配陰陽則其屬
當如此於人事上說則如何曰天下事未嘗不生於
憂患而死於安樂若這吉處不知戒懼自是生出吝
來雖未至於凶畢竟是向那凶路上去又曰日中則
昃月盈則食自古極亂未嘗不生於極治

學蒙

吉凶悔吝之象吉凶是兩頭悔吝在中間悔自凶而趨

吉吝自吉而趨凶

變孫

悔吝悔是做得過便有悔吝是做得這事軟了下梢無

收殺不及故有吝

端蒙

悔者將自惡而入善吝者將自善而入惡

節

剛過當為悔柔過當為吝

節

過便悔不及便吝

帶

變化者進退之象是剛柔之未定者剛柔者晝夜之象

是剛柔之已成者蓋柔變而趨於剛是退極而進剛

化而趨於柔是進極而退既變而剛則晝而陽既化

而柔則夜而陰猶言子午卯酉是陰陽之未定
子午是陰陽之已定又如四象之有老少故此兩句
惟以子午卯酉言之則明矣然陽化為柔只恁地消
縮去無痕迹故曰化陰變為剛是其勢浸長有頭面
故曰變此亦見陰半陽全陽先陰後陽之輕清無形
而陰之重濁有迹也銖曰陰陽以氣言剛柔以質言
既有卦爻可見則當以質言而不得以陰陽言矣故
彖辭多言剛柔不言陰陽不知是否曰是

銖

問變化者進退之象與化而裁之存乎變曰這變化字
又相對說那化而裁之存乎變底變字又說得來重
如云幽則有鬼神鬼神本皆屬幽然以鬼神二字相
對說則鬼又屬幽神又自屬明變化相對說則變是
長化是消問消長皆是化否曰然也都是變
更問此
兩句疑
以統體言則皆是化到換頭處使
是變若相對言則變屬長化屬消
化則漸漸化盡以
至於無變則驟然而長變是自無而有化是自有而
無問項見先生說變是自陰而陽化是自陽而陰亦

此意否曰然只觀出入息便見又問氣之發散者為陽收斂者為陰否曰也是如此如鼻氣之出入出者為陽收回者為陰入息如螺螄出殼了縮入相似是收入那出不盡底若只管出去不收便死矣問出入息畢竟出去時漸漸消到得出盡時便死否曰固是如此然那氣又只管生

個

或問變化二字曰變是自陰之陽忽然而變故謂之變化是自陽之陰漸漸消磨將去故謂之化自陰而陽

自是長得猛故謂之變自陽而之陰是漸漸消壓將

去闕

問變者化之漸化者變之成如昨日是夏今日是秋為
變到那全然天涼沒一些熱時是化否曰然又問這
箇變化字却與變化者進退之象不同如何曰這又
別有些意思是言剛化為柔柔變為剛蓋變是自無
而有化是自有而無也肅

問本義解吉凶者失得之象也一段下云剛柔相推而

生變化變化之極復為剛柔流行乎一卦六爻之中
而占者得因其所值以為吉凶之決切意在天地之
中陰陽變化無窮而萬物得因之以生生在卦爻之
中九六變化無窮而人始得因其變以占吉凶曰易
自是占其變若都變了只一爻不變則反以不變者
為主或都全不變則不變者又反是變也

學蒙

繫辭中如吉凶者失得之象一段解得自有功恐聖人
本意未必不如此問聖人以此洗心一段亦恐非先

儒所及曰也且得如此說不知畢竟是如何

榦

問所居而安者易之序也與居則觀其象之居不同上居字是揔就身之所處而言下居字是靜對動而言

曰然

學

問所居而安者易之序也曰序是次序謂卦及爻之初終如潛見飛躍循其序則安又問所樂而玩者爻之辭曰橫渠謂每讀每有益所以可樂蓋有契於心則

自然樂

備

居則觀其象玩其辭動則觀其變玩其占如何曰若是
理會不得却如何占得必是閒常理會得此道理到
用時便占備

右第二章

悔吝二義悔者將趨於吉而未至於吉吝者將趨於凶
而未至於凶又問所謂小疵者只是以其未便至於
吉凶否曰悔是漸好知道是錯了便有進善之理悔
便到无咎吝者喑鳴說不出心下不足没分曉然未

至大過故曰小疵然小疵畢竟是小過

雷

齊小大者存乎卦齊猶分辨之意一云猶斷也小謂否

睽之類大謂泰謙之類如泰謙之辭便平易睽困之

辭便艱險故曰卦有大小辭有險易

此說與本義異○人傑

齊小大者存乎卦曰齊字又不是整齊自有箇如準如

協字是分辨字泰為大否為小辭有險易直是吉卦

易凶卦險泰謙之類說得平易睽蹇之類說得艱險

雷

問憂悔吝者存乎介悔吝未至於吉凶是那初萌動可
以向吉凶之微處介又是悔吝之微處介字如界至
界限之界是善惡初分界處於此憂之則不至悔吝

矣曰然

學
蒙

憂悔吝者存乎介震无咎者存乎悔悔吝固是吉凶之
小者介又是幾微之間慮悔吝之來當察於幾微之
際无咎者本是有咎善補過則為无咎震動也欲動
而无咎為其能悔爾悔吝在吉凶之間悔是自凶而

趨吉吝是自吉而之凶悔吝小於吉凶而將至於吉

凶者也

謨

問卦有大小舊說謂大畜小畜大過小過如此則只說得四卦曰看來只是好底卦便是大不好底卦便是小如復如泰如大有如夬之類是好底卦如睽如困如小過底盡不好底譬如人光明磊落底便是好人昏昧迷暗底便是不好人所以謂卦有大小辭有險易大卦辭易小卦辭險即此可見

學

問卦有小大辭有險易陽卦為大陰卦為小觀其爻之
所向而為之辭如休復吉底辭自是平易如困于葛
藟底辭自是險曰這般處依約看也是恁地自是不
曾見得他底透只得隨衆說如所謂吉凶者失得之
象一段却是徹底見得聖人當初作易時意似這處
更移易一字不得其他處不能盡見得如此所以不
能盡見得聖人之心

學蒙

右第三章

分章今
依本義

問易與天地準故能彌綸天地之道曰易道本與天地
齊準所以能彌綸之凡天地間之物無非易之道故
易能彌綸天地之道而聖人用之也彌如封彌之彌
糊合便無縫罅綸如綸絲之綸自有條理言雖是彌
得外面無縫罅而中則事事物物各有條理彌如大
德敦化綸如小德川流彌而非綸則空踈無物綸而
非彌則判然不相干此二字見得聖人下字甚密也

學
履

問易與天地準故能彌綸天地之道曰凡天地有許多道理易上都有所以與天地齊準而能彌綸天地之道彌字若今所謂封彌試卷之彌又若彌縫之彌是恁地都無縫底意思解作徧滿也不甚似又曰天地有不了處易却彌縫得他

學蒙

彌綸天地之道彌字如封彌之義惟其封彌得無縫罅所以能徧滿也

問

仰以觀天文俯以察地理是故知幽明之故注云天文

則有晝夜上下地理則有南北高深不知如何曰晝
明夜幽上明下幽觀晝夜之運日月星辰之上下可
見此天文幽明之所以然南明北幽高明深幽觀之
南北高深可見此地理幽明之所以然又云始終死
生是以循環言精氣鬼神是以聚散言其實不過陰

陽兩端而已

學履

仰以觀於天文俯以察於地理天文是陽地理是陰然
各有陰陽天之晝是陽夜是陰日是陽月是陰地如

高屬陽下屬陰平坦屬陽險阻屬陰東南屬陽西北屬陰幽明便是陰陽

帶

問仰以觀於天文俯以察於地理是以此易書之理仰觀俯察否曰所以仰以觀天文俯以察地理是故知幽明之故幽明便是陰陽剛柔凡許多說話只是說一箇陰陽南便是明北便是幽日出地上便是明日入地下便是幽仰觀俯察便皆知其故

闕

觀文察變以至知鬼神之情狀皆是言窮理之事直是

要知得許多然後謂之窮理

謨

正卿問原始反終故知死生之說曰人未死如何知得死之說只是原其始之理將後面摺轉來看便見得以此之有知彼之無

闕

問反字如何曰推原其始而反其終謂如方推原其始初却摺轉一摺來如回頭之義是反回來觀其終也

審○人傑錄云却
回頭轉來看其終

精氣為物是合精與氣而成物精魂而氣魄也變則是

魂魄相離雖獨說遊魂而不言魄而離魄之意自可

見矣

學蒙

林安卿問精氣為物遊魂為變曰此是兩箇合一箇離精氣合則魂魄凝結而為物離則陽已散而陰無所歸故為變精氣為物精陰也氣陽也仁者見之謂之

仁智者見之謂之智仁陽也智陰也

人傑○義剛同

問尹子解遊魂一句為鬼神如何曰此只是聚散聚而為物者神也散而為變者鬼也鬼神便有陰陽之分

只於屈伸往來觀之橫渠說精氣自無而有遊魂自
有而無其說亦分曉然精屬陰氣屬陽然又自有錯
綜底道理然就一人之身將來橫看生便帶著箇死
底道理人身雖是屬陽而體魄便屬陰及其死而屬
陰又却是此氣便亦屬陽蓋死則魂氣上升而魄形
下降古人說徂落二字極有義理便是謂魂魄徂者
魂升于天落者魄降于地只就人身便亦是鬼神如
祭祀求諸陽便是求其魂求諸陰便是求其魄祭義

中宰我問鬼神一段說得好注解得亦好

當

問與天地相似故不違曰上面是說與天地準這處是說聖人與天地相似又曰與天地相似方且無外凡事都不出這天地範圍之內所以方始得知周乎萬物而道又能濟天下旁行也不走作

闕

與天地相似故不違上文言易之道與天地相似此言聖人之道與天地準也惟其人不違所以與天地相似若此心有外則與天地不相似矣此下數句皆是

與天地相似之事也上文易與天地準下數句皆易
與天地準之事也旁行而不流言其道旁行而不流
於偏也範圍天地之化而不過自有大底範圍又自
有小底範圍而今且就身上看一事有一箇範圍通
乎晝夜之道而知通訓兼言兼晝與夜皆知也

個

與天地相似是說聖人第一句汎說知周乎萬物至道
濟天下是細密底工夫知便直要周乎萬物無一物
之遺道直要濟天下

帶

知周乎萬物便是知幽明死生鬼神之理

闕

問注云知周萬物者天也道濟天下者地也是如何曰
此與後段仁者見之謂之仁知者見之謂之知又自
不同此以清濁言彼以動靜言智是先知得較虛故
屬之天道濟天下則普濟萬物實惠及民故屬之地
旁行不流樂天知命故不憂此兩句本皆是知之事
蓋不流便是貞也不流是本旁行是應變處無本則
不能應變能應變而無其本則流而入變詐矣細分

之則旁行是知不流屬仁其實皆是知之事對下文

安土敦乎仁故能愛一句專說仁也

學履

知周萬物是體旁行是可與權乃推行處樂天知命是

自處三節各說一理

淵

旁行而不流曰此小變而不失其大常然前後却有故
字又相對此一句突然易中自時有恁地處頗難曉
當

問樂天知命云通上下言之又曰聖人之知天命則異

於此某竊謂樂天知命便是說聖人曰此一段亦未
安樂天知命便是聖人異者謂與不知命無以為君

子自別

可學

安土敦乎仁對樂天知命言之所寓而安篤厚於仁更
無夾雜純是天理自易與天地準而下皆發明陰陽

之理

人餘

問安土敦乎仁故能愛曰此是與上文樂天知命對說
樂天知命是知崇安土敦仁是禮卑安是隨所居而

安在在處處皆安若自家不安何以能愛敦只是篤
厚去盡已私全是天理更無夾雜充足盈滿方有箇
敦厚之意只是仁而又仁敦厚於仁故能愛惟安土
敦仁則其愛自廣

蓄

安土者隨所寓而安若自擇安處便只知有己不知有
物也此厚於仁者之事故能愛也

去偽

安土敦乎仁故能愛聖人說仁是恁地說不似江西人
說知覺相似此句說仁最密

淵

範圍天地之化範是鑄金作範圍是圍裹如天地之化
都沒箇遮攔聖人便將天地之道一如用範來範成
箇物包裹了試舉一端如在天便做成四時十二月
二十四氣七十二候之類以此做箇塗轍更無過差
此特其小爾

備

問範圍天地之化而不過曰天地之化滔滔無窮如一
爐金汁鎔化不息聖人則為之鑄漏成器使人模範
匡郭不使過於中道也曲成萬物而不遺此又是就

事物之分量形質隨其大小闊狹長短方圓無不各成就此物之理無有遺闕範圍天地是極其大而言曲成萬物是極其小而言範圍如大德敦化曲成如

小德川流

學履

問範圍天地之化而不過如天之生物至秋而成聖人則為之斂藏人之生也欲動情勝聖人則為之教化防範此皆是範圍而使之不過之事否曰範圍之事闊大此亦其一事也今且就身上看如何或曰如視

聽言動皆當存養使不過差此便是否曰事事物物無非天地之化皆當有以範圍之就喜怒哀樂而言喜所當喜怒所當怒之類皆範圍也能範圍之不過曲成之不遺方始見得這神無方易無體若範圍有不盡曲成有所遺神便有方易便有體矣

學蒙

通乎晝夜之道而知既曰通又曰知似不可曉然通是兼通若通晝不通夜通生不通死便是不知便是神有方易有體了

學蒙

通乎晝夜之道而知通字只是兼乎晝夜之道而知其
所以然大抵此一章自易與天地準以下只是言箇
陰陽仁者見之謂之仁仁亦屬陽知者見之謂之知
知亦屬陰此就人氣質有偏處分陰陽如繼之者善
成之者性便於造化流行處分陰陽因問尹子鬼神
情狀只是解遊魂為變一句即是將神字亦作鬼字
看了程張說得甚明白尹子親見伊川何以不知此
義曰尹子見伊川晚又性質朴鈍想伊川亦不曾與

他說

神無方而易無體神便是忽然在陰又忽然在陽底易便是或為陰或為陽如為春又為夏為秋又為冬交錯代換而不可以形體拘也

學履

神無方易無體神自是無方易自是無體方是四方上下神却或在此或在彼故云無方易無體者或自陰而陽或自陽而陰無確定底故云無體自與那其體則謂之易不同各自是說一箇道理若恁地滾將來

說少間都說不去他那箇是說上天之載無聲無臭
其體則謂之易這只是說箇陰陽動靜闢闔剛柔消
長不著這七八箇字說不了若喚做易只一字便了
易是變易陰陽無一日不變無一時不變莊子分明
說易以道陰陽要看易須當恁地看事物都是那陰
陽做出來

淵

易無體這箇物事逐日各自是箇頭面日異而時不同

淵

右第四章

一陰一陽之謂道陰陽何以謂之道曰當離合看

可學

一陰一陽之謂道陰陽是氣不是道所以為陰陽者乃道也若只言陰陽之謂道則陰陽是道今曰一陰一陽則是所以循環者乃道也一闔一闢謂之變亦然

驤

問一陰一陽之謂道曰此與一闔一闢謂之變相似陰陽非道也一陰又一陽循環不已乃道也只說一陰

一陽便見得陰陽往來循環不已之意此理即道也
又問若爾則屈伸往來非道也所以屈伸往來循環
不已乃道也先生頷之 銖

道須是合理與氣看理是虛底物事無那氣質則此理
無安頓處易說一陰一陽之謂道這便兼理與氣而
言陰陽氣也一陰一陽則是理矣猶言一闔一闢謂
之變闔闢非變也一闔一闢則是變也蓋陰陽非道
所以陰陽者道也橫渠言由氣化有道之名合虛與

氣有性之名意亦以虛為理然虛却不可謂之理理則虛爾亦猶敬則虛靜不可把虛靜喚作敬

端蒙

問本義云道具於陰而行乎陽竊意道之大體云云是則動靜無端陰陽無始要之造化之初必始於靜曰既曰無端無始如何又始於靜看來只是一箇實理動則為陽靜則為陰云云今之所謂動者便是前面靜底末梢其實靜前又動動前又靜只管推上去更無了期所以只得從這處說起

闕

或問一陰一陽之謂道曰以一日言之則晝陽而夜陰
以一月言之則望前為陽望後為陰以一歲言之則
春夏為陽秋冬為陰從古至今恁地滾將去只是箇
陰陽是孰使之然哉乃道也從此句下又分兩脚此
氣之動為人物渾是一箇道理故人未生以前此理
本善所以謂繼之者善此則屬陽氣質既定為人為
物所以謂成之者性此則屬陰

學
蒙

問一陰一陽之謂道曰一陰一陽此是天地之理如大

哉乾元萬物資始乃繼之者善也乾道變化各正性命此成之者性也這一段是說天地生成萬物之意不是說人性上事

謨○去
偽同

一陰一陽之謂道太極也繼之者善生生不已之意屬陽成之者性各正性命之意屬陰通書第一章可見如說純粹至善却是統言道理

人傑

一陰一陽之謂道就人身言之道是吾心繼之者善是吾心發見惻隱羞惡之類成之者性是吾心之理所

以為仁義禮智是也

人傑

問孟子只言性善易繫辭却云一陰一陽之謂道繼之者善也成之者性也如此則性與善却是二事曰一陰一陽是總名繼之者善是二氣五行事成之者性是氣化已後事

去偽

流行造化處是善凝成於我者即是性繼是接續綿綿不息之意成是凝成有主之意

大雅

造化所以發育萬物者為繼之者善各正其性命者為

成之者性翰

繼之者善也元亨是氣之方行而未著於物也是上一
截事成之者性也利貞是氣之結成一物也是下一

截事節

繼之者善方是天理流行之初人物所資以始成之者
性則此理各自有箇安頓處故為人為物或昏或明
方是定若是未有形質則此性是天地之理如何把
做人物之性得

端蒙

繼之者善成之者性性便是善

可學

繼之者善如水之流行成之者性如水之止而成潭也

椿

問繼之者善成之者性是道是器曰繼之成之是器善

與性是道

人傑

易大傳言繼善是指未生之前孟子言性善是指已生

之後雖曰已生然其本體初不相離也

錄

或問成之者性曰性如寶珠氣質如水水有清有汙故

珠或全見或半見或不見又問先生嘗說性是理本無是物若譬之寶珠則却有是物曰譬喻無十分親

彻底

蓋
卿

問仁者見之至鮮矣曰此言萬物各具是性但氣稟不同各以其性之所近者窺之故仁者只見得他發生流動處便以為仁知者只見得他貞靜處便以為知下此一等百姓日用之間習矣而不察所以君子之

道鮮矣

學
蒙

顯諸仁藏諸用二句只是一事顯諸仁是可見底便是
繼之者善也藏諸用是不可見底便是成之者性也
藏諸用是顯諸仁底骨子正如說一而二二而一者
也張文定公說事未判屬陽已判屬陰亦是此意顯
諸仁藏諸用亦如元亨利貞潜錄云是元亨誠
之通利貞誠之復元亨
是發用流行處利貞便是流行底骨子又曰顯諸仁
德之所以盛藏諸用業之所以成譬如一樹一根生
許多枝葉花實此是顯諸仁處及至結實一核成一

箇種子此是藏諸用處生生不已所謂日新也萬物無不具此理所謂富有也

箇

顯諸仁藏諸用二句本只是一事藏諸用便在那顯諸仁裏面正如昨夜說一故神兩故化相似只是一事顯諸仁是可見底藏諸用是不可見底顯諸仁是流行發用處藏諸用是流行發見底物顯諸仁是千頭萬緒藏諸用只是一箇物事藏諸用是顯諸仁底骨子譬如一樹花皆是顯諸仁及至此花結實則一花

自成一實方衆花開時共此一樹共一箇性命及至
結實成熟後一實又自成一箇性命如子在魚腹中
時與母共是一箇性命及子既成則一子自成一性
命顯諸仁千變萬化藏諸用則只是一箇物事一定
而不可易張乖崖說公事未判時屬陽已判後屬陰
便是這意公事未判生殺輕重皆未定及已判了更
不可易顯諸仁便是繼之者善也藏諸用便是成之
者性也天下之事其燦然發見處皆是顯然者然一

事自是一事一物自是一物如元亨利貞元亨是發
用流行處貞便是流行底骨子流行箇甚麼只是流
行那貞而已或曰正如乾道變化各正性命否曰顯
諸仁似恕藏諸用似忠顯諸仁似貫藏諸用似一如
水流而為川止而為淵激而為波浪雖所居不同然
皆是水也水便是骨子其流處激處皆顯者也顯諸
仁如惻隱之心藏諸用似仁也惻隱羞惡辭讓是非
顯諸仁也仁義禮智藏諸用也只是這箇惻隱隨事

發見及至成那事時一事各成一仁此便是藏諸用
其發見時在這道理中發去及至成這事時又只是
這箇道理一事既各成一道理此便是業業是事之
已成處事未成時不得謂之業盛德便是顯諸仁處
顯諸仁者德之所以盛藏諸用者業之所以成鼓萬
物而不與聖人同憂此正是顯諸仁藏諸用底時節
盛德大業便是顯仁藏用成就處也又曰耳之能聽
目之能視口之能言手之能執足之能履皆是發處

也畢竟怎生會恁地發用釋氏便將這些子來瞞人
秀才不識便被瞞又云一叢禾他初生時共這一
株結成許多苗葉花實共成一箇性命及至收成結
實則一粒各成一箇性命只管生生不已所謂日新
也富有之謂大業言萬物萬事無非得此理所謂富
有也日新是只管運用流行生生不已道家修養有
納甲之法皆只用乾坤艮巽震兌六卦流行運用而
不用坎離便是那六卦流行底骨子所以流行運用

者只流行此坎離而已便是顯諸仁藏諸用之說顯諸仁是流行發見處藏諸用是流行發見底物正如以穀喻仁是藏諸用也及發為親親仁民愛物一事又各自成一仁顯諸仁是用底迹藏諸用是仁底心問本義云顯者陽之仁也德之發也藏者陰之知也業之成也

按此問是
据未定本

竊意以為天地之理動而陽則萬

物之發生者皆其仁之顯著靜而陰則其用藏而不
可見其顯諸仁則是德之發見其藏諸用則萬物各

得以為性是業之成也曰不如此這處極微難說又
曰顯諸仁易說藏諸用極難說這用字如橫渠說一
故神神字用字一樣顯諸仁如春生夏長發生彰著
可見者藏諸用是所以生長者藏在裏面而不可見
又這箇有作先後說處如元亨利貞之類有作表裏
說處便是這裏又曰元亨利貞也可作表裏說所謂
流行者別無物事只是流行這箇又曰譬之仁發出
來便是惻隱之心便是顯諸仁仁便是藏諸用又曰

仁便藏在惻隱之心裏面仁便是那骨子到得成就得數件事了一件事上自是一箇仁便是那業處又曰流行時便是公共一箇到得成就處便是各具一箇又曰惻隱之心方是流行處到得親親仁民愛物方是成就處但盛德便屬之顯諸仁大業便屬之藏諸用又曰如此一穗禾其始只用一箇母子少間成穀一箇各自成得一箇將去種植一箇又自成一穗又開枝開葉去所以下文謂富有之謂大業又曰須

是去靜坐體認方可見得四時運行萬物終始若道有箇物行又無形影若道無箇物又怎生會恁地

鼓萬物而不與聖人同憂此言造化之理如聖人則只是人安得而無憂

謨

天地造化是自然聖人雖生知安行然畢竟是有心去做所以說不與聖人同憂

淵

問鼓萬物而不與聖人同憂曰明道兩句最好天地無心而成化聖人有心而無為無心便是不憂成化便

是鼓萬物天地鼓萬物亦何嘗有心來

去偽

盛德大業至矣哉是贊歎上面顯諸仁藏諸用

淵

盛德大業以下都是說易之理非指聖人而言

螢

盛德大業一章曰既說盛德大業又說他只管恁地生去所以接之以生生之謂易是漸漸說入易上去乾只畧成一箇形象坤便都呈見出許多法來到坤處都細了萬法一齊出見效字如效順效忠效力之效極數知來之謂占占出這事人便依他這箇做便是

通變之謂事看來聖人到這處便說在占上去則此書分明是要占矣陰陽不測之謂神是總結這一段不測者是在這裏又在那裏便是這一箇物事走來走去無處不在六十四卦都說了這又說三百八十四爻許多變化只是這一箇物事周流其間

學蒙

先說箇富有方始說日新此與說宇宙相似先是有這物事了方始相連相續去自富有至效法是說其理如此用處却在那極數知來與通變上面蓋說上面

許多道理要做這用

淵

問日新之謂盛德生生之謂易陰陽不測之謂神要思而得之明道提此三句說意是如何曰此三句也是緊要須是看得本文方得問德是得於已底業是發出來底德便是本生生之謂易便是體成象之謂乾效法之謂坤便只是裏面交藉底曰乾坤其易之緼易是一塊乾坤是在裏面往來底聖人作易便是如此又問陰陽不測之謂神便是妙用處曰便是包括許多道理

變
孫

成象之謂乾此造化方有此顯露處效法之謂坤以法言之則大段詳密矣效字難看如效力效誠之效有陳獻底意思乾坤只是理理本無心自人而觀猶必待乾之成象而後坤能效法然理自如此本無相待且如四時亦只是自然迭運春夏生物初不道要秋冬成之秋冬成物又不道成就春夏之所生皆是理之所必然者爾

謨

成象之謂乾效法之謂坤依舊只是陰陽凡屬陽底便

是只有箇象而已象是方做未成形之意已成便屬陰成象謂如日月星辰在天亦無箇實形只是箇懸象如此乾便略坤便詳效如陳效之效若今人言效力之類法是有一成已定之物可以形狀見者如條法亦是實有已成之法

備

效法之謂坤到這箇坤時都仔細詳審了一箇是一箇模樣效猶呈一似說效犬效羊效牛效馬言呈出許多物大槩乾底只是做得箇形象到得坤底則漸次

詳密資始資生於此可見

淵

效呈也如曲禮效犬者左牽之之效猶言效順效忠效力也蓋乾只是成得箇大象坤便呈出那法來

成象之謂乾謂風霆雨露日星只是箇象效者效力之效效法則效其形法而可見也

人傑

右第五章

夫易廣矣大矣至靜而正是無大無小無物不包然當體便各具此道理靜而正須著工夫看徐又曰未動

時便都有此道理都是真實所以下箇正字

審

以言乎邇則靜而正以言乎天地之間則備矣靜而正
謂觸處皆見有此道不待安排不待措置雖至小至
近至鄙至陋之事無不見有隨處皆見足無所欠闕

只觀之人身便見

見有見足之見
賢遍反○個

其動也闕大抵陰是兩件如陰爻兩畫闕是兩開去翕
是兩合如地皮上生出物來地皮須開今論天道包
著地在然天之氣却貫在地中地却虛有以受天之

氣下文有大生廣生云者大是一箇大底物事廣便是容得許多物事大字實廣字虛

滄

其靜也翕其動也闢地到冬間氣都翕聚不開至春則天氣下入地地氣開以迎之又曰陰陽與天地自是兩件物事陰陽是二氣天地是兩箇有形質底物事如何做一物說得不成說動為天而靜為地無此理正如鬼神之說

問

乾靜專動直而大生坤靜翕動闢而廣生這說陰陽體

性如此卦畫也髣髴似恁地

淵

乾坤二卦觀之亦可見乾畫奇便見得其靜也專其動

也直坤畫耦便見得其靜也翕其動也闕

直卿○
端蒙

天體大是以大生焉地體虛是以廣生焉廣有虛之義

如河廣漢廣之廣

敬仲

本義云乾一而實故以質言而曰大坤二而虛故以量
言而曰廣學者請問曰此兩句解得極分曉蓋曰以
形言之則天包地外地在天中所以說天之質大以

理與氣言之則地却包著天天之氣却盡在地之中地盡承受得那天之氣所以說地之量廣天只是一箇物事一故實從裏面便實出來流行發生只是一箇物事所以說乾一而實地雖是堅實然却虛所以天之氣流行乎地之中皆從地裏發出來所以說坤二而虛用之云地形如肺形質雖硬而中本虛故陽氣升降乎其中無所障礙雖金石也透過去地便承受得這氣發育萬物曰然要之天形如一箇鼓鞞天

便是那鼓鞀外面皮殼子中間包得許多氣開闔消
長所以說乾一而實地只是一箇物事中間盡是這
氣升降來往緣中間虛故容得這氣升降來往以其
包得地所以說其質之大以其容得天之氣所以說
其量之廣非是說地之形有盡故以量言也只是說
地盡容得天之氣所以說其量之廣耳今治厯家用
律呂候氣其法最精氣之至也分寸不差便是這氣
都在地中透上來如十一月冬至黃鍾管距地九寸

以葭灰實其中至之日氣至灰去晷刻不差又云看來天地中間此氣升降上下當分為六層十一月冬至自下面第一層生起直到第六層上極至天是為四月陽氣既生足便消下面陰氣便生只是這一氣升降循環不已往來乎六層之中也問月令中天氣下降地氣上騰此又似天地各有氣相交合曰只是這一氣只是陽極則消而陰生陰極則消而陽生天氣下降便只是冬至復卦之時陽氣在下面生起故

云天氣下降或曰據此則却是陰消於上而陽生於下却見不得天氣下降曰也須是天運一轉則陽氣在下故從下生也今以天運言之則一日自轉一匝然又有那大轉底時候須是大著心腸看始得不可拘一不通也蓋天本是箇大底物事以偏滯求他不得個

問陰耦陽奇就天地之實形上看如何見得曰天是一箇渾淪底物雖包乎地之外而氣則迸出乎地之中

地雖一塊物在天之中其中實虛容得天之氣迸上來繫辭云乾靜也專動也直是以大生焉坤靜也翕動也闢是以廣生焉大生是渾淪無所不包廣生是廣闊能容受得那天之氣專直則只是一物直去翕闢則是兩箇翕則闢闢則開此奇耦之形也又曰陰偏只是一半兩箇方做得一箇

學履

易不是象乾坤乾坤乃是易之子目下面一壁子是乾一壁子是坤蓋說易之廣大是這乾便做他那大坤

便做他那廣乾所以說大時塞了他中心所以大坤
所以說廣時中間虛容得物所以廣廣是說他廣闊
著得物常說道地對天不得天便包得地在中心然
而地却是中虛容得氣過容得物便是他廣天是一
直大底物事地是廣闊底物有坳處有陷處所以說
廣這箇只是說理然也是說書有這理便有這書書
是載那道理底若死分不得大槩上面幾句是虛說
底這箇配天地四時日月至德是說他實處

淵

陰陽雖便是天地然畢竟天地自是天地廣大配天地時這箇理與他一般廣大淵

廣大配天地變通配四時陰陽之義配日月以易配天

易簡之善配至德以易配人之至德

人傑

問易簡之善配至德曰此是以易中之理取外面一事

來對謂易之廣大故可配天地易之變通如老陽變

陰老陰變陽往來變化故可配四時陰陽之義便是

日月相似易簡之善便如人之至德

當

問廣大配天地變通配四時這配字是配合底意思否
曰只是相似之意又問易簡之善配至德曰也是易
上有這道理如人心之至德也

學履

林安卿問廣大配天地配莫是配合否曰配只是似且
如下句云變通配四時四時如何配合四時自是流
行不息所謂變通者如此又問易簡之善配至德曰
易簡是常行之理至德是自家所得者又問伊川解
知微知彰知柔知剛云知微則知彰知柔則知剛如

何曰只作四截看較闊言君子無所不知良久笑云
向時有箇人出此語令楊大年對楊應聲云小人不
恥不仁不畏不義無如此恰好

義剛

問廣大變通是易上自有底道理是易上所說造化與
聖人底曰都是他易上說底又曰配是分配之義是
分這一半在那上面問曰如此便全無配之底意曰
也有些子分此以合彼意思欲見其廣大則於天地
乎觀之欲見其變通則於四時乎觀之欲知其陰陽

之義則觀於日月可見欲知其簡易則觀於聖人之至德可見

右第六章

崇德廣業知宗天也是致知事要得高明禮卑地也是踐履事卑是事事都要踐履過凡事踐履將去業自然廣

禮卑是卑順之意卑便廣地卑便廣高則狹了人若只揀取高底做便狹兩脚踏地做方得若是著件物事

填教一二尺高便不穩了如何會廣地卑便會廣世上更無卑似地底又曰地卑是從貼底謹細處做將去所以能廣淵

知崇禮卑一段云地至卑無物不載在地上縱開井百尺依舊在地上是無物更卑得似地所謂德言盛禮言恭禮是要極卑故無物事無箇禮至於至微至細底事皆當畏懼戒謹戰戰兢兢惟恐失之這便是禮之卑處曲禮曰毋不敬自上東階先右足上西階先

左足羹之有菜者用挾無菜者不用挾無所不致其謹這便都是卑處又曰似這處不是他特地要恁地是他天理合如此知識日多則知日高這事也合理那事也合理積累得多業便廣

學蒙○或錄詳見下

禮極是卑底物事如地相似無有出其下者看甚麼物事他盡載了縱穿地數十丈深亦只在地之上無緣更有卑於地者也知却要極其高明而禮則要極於卑順如禮儀三百威儀三千纖悉委曲無非至卑之

事如羹之有菜者用挾其無菜者不用挾主人升東階客上西階皆不可亂然不是強安排皆是天理之自然如上東階則先右足上西階則先左足蓋上西階而先右足則背却主人上東階而先左足則背却客自是理合如此又曰知崇者德之所以崇禮卑者業之所以廣蓋禮纔有些不到處這便有所欠闕業便不廣矣惟是極卑無所欠闕所以廣

知崇禮卑知是知處禮是行處知儘要高行却自近起

學可

知識貴乎高明踐履貴乎著實知既高明須放低著實

做去銖

學只是知與禮他這意思却好禮便細密中庸致廣大

盡精微等語皆只是說知禮淵

知崇禮卑這是兩截知崇是知識超邁禮卑是須就切實處行若知不高則識見淺陋若履不切則所行不實知識高便是象天所行實便是法地識見高於上

所行實於下中間便生生而不窮故說易行乎其中
成性存存道義之門大學所說格物致知是知崇之
事所說誠意正心脩身齊家治國平天下是禮卑之

事

賀孫

上文言知崇禮卑崇效天卑法地人崇其知須是如天
之高卑其禮須如地之廣天地設位一句只是引起
要說知崇禮卑人之知禮能如天地便能成其性存
其存道義便自此出所謂道義便是易也成性存存

不必專主聖人言

去偽

成性猶言見成底性這性元自好了但知崇禮卑則成

性便存存

學蒙

成性只是本來性

節

成性不曾作壞底存謂常在這裏存之又存

泳

成性如名明德如表德相似天命都一般

泳

或問成性存存是不忘其所存曰衆人多是說到聖人

處方是性之成看來不如此成性只是一箇渾淪之

性存而不失便是道義之門便是生生不已處

卓

成性與成之者性也止爭些子不同成之者性便從上說來言成這一箇物成性是說已成底性如成德成說之成然亦只爭些子也如正心心正誠意意誠相

似

賀孫

成性存存道義之門只是此性萬善完具無有欠缺故曰成性成對虧而言成之者性則是成就處無非性猶曰誠斯立焉橫渠伊川說成性似都就人為處說

恐不如此橫渠有習以成性底意思伊川則言成其

性存其所存

端蒙

橫渠謂成其性存其存伊川易傳中亦是存其存却是

遺書中說作生生之謂易意思好

必大錄云成性如言成就存存是生

生不已之意○備

知禮成性而道義出程子說成性謂是萬物自有成性存存便是生生不已這是語錄中說此意却好及他解易却說成其性存其存又似不恁地前面說成性

謂如成事成法之類是見成底性橫渠說成性別且如堯舜性之是其性本渾成學者學之須是以知禮做也到得他成性處道義出謂這裏流行道體也義用也又曰性是自家所以得於天底道義是衆人公

共底

夔孫

橫渠言成性與古人不同他所說性雖是那箇性然曰成性則猶言踐形也又曰他是說去氣稟物欲之私

以成其性

道夫

知崇禮卑則性自存橫渠之說非是如云性未成則善惡混當亶亶而繼之以善云云又云纖惡必除善斯成性矣皆是此病知禮成性則道義出先生本義中引此而改成為存又曰橫渠言成性猶孟子云踐形此說不是夫性是已然已成之性豈待習而後成邪他從上文繼之者善也成之者性也便是如此說來與孔子之意不相似

個

橫渠知崇天也一段言知識高明如天形而上指此理

通乎晝夜而知通猶兼也兼陰陽晝夜之道而知知晝而不知夜知夜不知晝則知皆未盡也合知禮而

成性則道義出矣知禮行處也

端蒙

問橫渠知禮成性之說曰橫渠說成性謂是渾成底性知禮成性如習與性成之意同又問不以禮性之曰如堯舜性之相似但他言語艱意是如此

變孫

右第七章

朱子語類卷七十四